

Cadeirydd y Pwyllgor Plant, Pobl Ifanc ac Addysg
Cadeirydd y Pwyllgor Newid Hinsawdd, yr Amgylchedd a Seilwaith
Cadeirydd y Pwyllgor Diwylliant, Cyfathrebu, y Gymraeg, Chwaraeon a Chysylltiadau Rhyngwladol
Cadeirydd Pwyllgor yr Economi, Masnach a Materion Gwledig
Cadeirydd y Pwyllgor Cydraddoldeb a Chyfiawnder Cymdeithasol
Cadeirydd y Pwyllgor Iechyd a Gofal Cymdeithasol
Cadeirydd y Pwyllgor Deddfwriaeth, Cyfiawnder a'r Cyfansoddiad
Cadeirydd y Pwyllgor Llywodraeth Leol a Thai

8 Mai 2024

Annwyl Gadeiryddion Pwyllgorau,

Cyllideb Ddrafft Llywodraeth Cymru ar gyfer 2025-26: Ymgysylltu

Yn ein cyfarfod ar 24 Ebrill 2022, trafododd y Pwyllgor Cyllid (y Pwyllgor) ei raglen ymgysylltu ar gyfer Cyllideb Ddrafft Llywodraeth Cymru 2025-26, sydd ar ddod, cyn dadl flynyddol y Pwyllgor yn y Cyfarfod Llawn ar flaenoriaethau gwariant, a drefnwyd ar gyfer 17 Gorffennaf. Rwy'n ysgrifennu at Gadeirydd pob pwyllgor pwnc i rannu ein syniadau. Mae'r Pwyllgor wedi cytuno i gynnal nifer o weithgareddau ymgysylltu cyn i'r Gyllideb Ddrafft gael ei chyhoeddi yn hwyrach eleni. Mae'r rhain yn cynnwys digwyddiad i randdeiliaid, grwpiau ffocws a gynhaliwyd gyda'r cyhoedd, ac amrywiol ddulliau eraill o gasglu barn pobl ifanc.

Digwyddiad i randdeiliaid: Caerfyrddin

Bydd y digwyddiad i randdeiliaid eleni yn cael ei gynnal yng Nghanolfan S4C, Yr Egin, ddydd Iau 13 Mehefin. Bydd hwn yn gyfle i'r Pwyllgor glywed yn uniongyrchol gan sefydliadau/unigolion sydd â diddordeb ar y cynigion arfaethedig ar gyfer y Gyllideb Ddrafft, yn ogystal â'u barn ar ddull Llywodraeth Cymru o osod y gyllideb a blaenoriaethu adnoddau. Gan fod gwaith ar draws y pwyllgorau i ymgysylltu â rhanddeiliaid ar y gyllideb yn hanfodol ar gyfer gwaith craffu effeithiol, hoffwn wahodd Cadeiryddion y Pwyllgorau neu Aelod o bob Pwyllgor i ymuno â'r digwyddiad. Os

oes gan Gadeiryddion neu Aelodau ddiddordeb mewn dod i'r digwyddiad, dylech gysylltu â'r tîm clericio erbyn 20 Mai, gan ddefnyddio'r cyfeiriad e-bost a ganlyn: SeneddCyllid@Senedd.Cymru.

Ceisio barn y cyhoedd yng Nghymru drwy gynnal grwpiau ffocws ar gyfer ymgysylltu â dinasyddion

Ar ran y Pwyllgor, bydd y Tîm Ymgysylltu â Dinasyddion yn y Senedd yn cynnal cyfres o grwpiau ffocws cyhoeddus ar y gyllideb ddrafft. Mae'r tîm wedi cynnal ymarferion tebyg dros y blynyddoedd diwethaf, a nod y gwaith hwn yw llunio astudiaeth trawstoriadol a fydd yn caniatáu i'r Pwyllgor fonitro safbwyntiau ac agweddau dros amser. Deuir o hyd i gyfranogwyr drwy sefydliadau partner tebyg er mwyn cael yr un ddemograffeg â'r hyn a gafwyd y llynedd, a bydd grwpiau'n cael eu trefnu i ganolbwyntio ar feysydd polisi penodol. Bydd y Tîm Ymgysylltu â Dinasyddion yn rhannu dyddiadau'r sesiynau â phob Pwyllgor, ar gyfer unrhyw Aelod sydd am gymryd rhan. Bydd hyn yn gyfle i Aelodau glywed yn uniongyrchol gan ddinasyddion Cymru ynghylch lle y dylid blaenoriaethu gwariant.

Ymgysylltu â phobl ifanc

Mewn blynyddoedd blaenorol – er mwyn ategu ein gwaith ymgysylltu ymhellach – mae'r Pwyllgor wedi cynnal gweithdy gydag Aelodau o'r Senedd leuenticid. Gan nad oes Sesiwn o'r Senedd leuenticid yn mynd rhagddi hyn o bryd, bydd y Pwyllgor yn ymgysylltu â phobl ifanc mewn gwahanol ffyrdd. Bydd cyfle i bobl ifanc roi eu barn yn Eisteddfod Genedlaethol yr Urdd, yr Eisteddfod Genedlaethol ac yn y Sioe Frenhinol. At hynny, mae'r Tîm Ymgysylltu â Dinasyddion yn trefnu gweithdy pwrpasol ar gyfer pobl ifanc a bydd yn gwahodd cyfranogwyr o Goleg y Cymoedd, y Gwasanaeth Eiriolaeth leuenticid Cenedlaethol a *Voices from Care Cymru*. Bydd y Tîm Cyfathrebu Digidol hefyd yn defnyddio offer cyfryngau cymdeithasol rhyngweithiol i annog ymgysylltiad, a byddem yn gwerthfawrogi pe byddai Pwyllgorau eraill yn defnyddio eu presenoldeb cyfryngau cymdeithasol eu hunain i hyrwyddo'r gwaith hwn.

Dadl y Pwyllgor Cyllid yn y Cyfarfod Llawn ar flaenoriaethau gwariant Llywodraeth Cymru

Fel y soniwyd uchod, mae'r Pwyllgor yn bwriadu cynnal dadl yn y Cyfarfod Llawn ddydd Mercher 17 Gorffennaf ar flaenoriaethau gwariant Llywodraeth Cymru ar gyfer 2025-26. Bydd canlyniadau ein gwaith ymgysylltu yn llywio'r ddadl honno ac yn bwydo i mewn iddi, a dyma fydd y cyfle gorau i ddylanwadu ar flaenoriaethau gwariant Llywodraeth Cymru cyn i'r Gyllideb Ddrafft gael chyhoeddi'n hwyrach eleni. Fel ar bob adeg, dyma estyn croeso mawr i gyfraniad Cadeiryddion Pwyllgorau – yn ogystal ag Aelodau eraill – yn rhan o'r ddadl hon, i sicrhau bod cynlluniau gwariant Llywodraeth Cymru yn cael eu llywio gan safbwyntiau a blaenoriaethau Pwyllgorau'r Senedd.

Y dull o graffu ar y gyllideb

Cyn hir, byddaf yn ysgrifennu at Gadeiryddion ynghylch dull y Pwyllgor o graffu ar y gyllideb, gan gynnwys gwybodaeth am yr ymgynghoriad a'r amserlen unwaith y bydd y Trefnydd wedi hysbysu'r Pwyllgor Busnes am ddyddiadau cyhoeddi'r Gyllideb Ddrafft cyn toriad yr haf.

Os oes gennych gwestiynau am unrhyw agwedd ar broses y gyllideb ddrafft, mae croeso i chi gysylltu â mi neu ag Owain Roberts, Clerc y Pwyllgor Cyllid, ar 0300 200 6388, seneddcyllid@senedd.cymru.

Yn gywir



Peredur Owen Griffiths
Cadeirydd y Pwyllgor Cyllid

Croesewir gohebiaeth yn Gymraeg neu Saesneg.

We welcome correspondence in Welsh or English.

